

**ԿԵՆՍԱԳՐԱԿԱՆ**

**ՄԱԿԱՐ ԵՊԻՍԿՈՊՈՍ ԲԱՐԵՈՒԴԱՐԵԱՆՅԻ  
ԿԵԱՆՔՆ ՈՒ ԳՈՐԾՈՒՆԷՈՒԹԻՒՆԸ  
(1832-1906)**

XIX դարը նշանաւորուեց գիտական մտքի վերելքով, որի արդիւնքում ձեւաւորւեցին եւ սկզբնաւորուեցին գիտական նոր ուղղութիւններ: Դրանցից մէկն էր վիմագրագիտութիւնը՝ յուշարձանների որմերին պահպանուած հայատառ գրերի գրառումն ու վերծանութիւնը: Պատմական Հայաստանի ողջ տարածքում պահպանուել են շինարարական, նուիրատուական, իրաւականոնական, յիշատակագրային բնոյթի աւելի քան տասը հազար արձանագրութիւն: Վիմական արձանագրութիւններ են պահպանուել նաեւ հայրենիքից դուրս՝ գաղթօճախներում: Որպէս հաւաստի պատմական աղբիւրներ՝ դրանք հարուստ տեղեկութիւններ են հաղորդում ժամանակի հասարակական յարաբերութիւնների մասին<sup>1</sup>:

Վիմագրերի հաւաքման, ուսումնասիրման գործընթացն իրականացնելու համար կարեւոր է ազգային, մշակութային եւ հոգեւոր գործիչ, Ամենայն Հայոց Կաթողիկոս Ներսէս Աշտարակեցու դերը (1843-1857 թթ.), ով կարգադրել է հաւաքել Հայաստանում սփռուած պատմական յուշակոթողների վրայ փորագրուած «ամենայն զիշատակագրութիւնս»<sup>2</sup>:

Արդիւնքում, Հայաստանի տարբեր բնակավայրերի պատմամշակութային կոթողներից ու խաչքարերից գրի առնուեցին հարիւրաւոր վկայագրեր: XIX դարի կէսերին այդ գործում աննախագէտ ներդրում ունեցան տեղագիր-ճանապարհորդները՝ Յովհաննէս Եպիսկոպոս Շահխաթունեանը, Սարգիս Արքեպիսկոպոս Զաւլաբանցը, Մինաս Վարդապետ Բժշկեանցը<sup>3</sup>, Մկրտիչ Էմինը<sup>4</sup>, Մեսրոպ Արքեպիսկոպոս Սմբատեանցը, Մակար Եպիսկոպոս Բարխուդարեանցը, Կարապետ Կոստանեանը, ինչպէս նաեւ Գարեգին Արքեպիսկոպոս Յովսէփեանցը<sup>5</sup> (յետագայում՝ Մեծի Տանն Կիլիկիոյ Կաթողիկոս), ազգագրագէտ Երուանդ Լալայեանը եւ ուրիշներ, ովքեր ծաւալեցին հայագիտական բեղուն գործունէութիւն: Իւրօրինակ ներդրում ունեցաւ Վենետիկի Մխիթարեան միաբանութեան անդամ Ղեւոնդ Ալիշանը, ով արդէն հրատարակուած եւ հայաստանեան թղթակիցներից իրեն ուղարկուած նորայայտ վիմագրերն ամբողջացնելով՝ ստեղծեց կարեւոր եւ մինչ օրս գիտական մեծ արժէք ունեցող ստուար հատորներ:

Տեղագիրներից է պատմաբան, ազգագրագէտ, բանասէր, մանկավարժ, գրող Մակար (Գէորգ) Եպիսկոպոս Բարխուդարեանցը, ով տարիների ընթացքում ձեռք բերեց

<sup>1</sup> Ս. Բարխուդարեան, Ն. Մառն ու վիմագրութիւնը, «Մառն եւ հայագիտութեան հարցերը», Երեւան, 1968, էջ 41:

<sup>2</sup> Դիւան հայ վիմագրութեան (այսուհետ՝ ԴՏՎ), Անի ֆաղաֆ, կազմեց Հ. Օրբելին, պրակ I, Հայկական վիմագրութիւն, Երեւան, 1966, էջ XVIII:

<sup>3</sup> Մինաս Վրդ. Բժշկեան, Ճանապարհորդութիւն ի Լեհաստան, Վենետիկ, 1830:

<sup>4</sup> Н. О. Эмин, Армянские надписи в Карсе, Ани и в окрестностях последнего, Москва, 1881.

<sup>5</sup> Գ. Յովսէփեան, Խաղբակեանք կամ Պոռթեանք հայոց պատմութեան մէջ, հատոր Գ, Նիւ Եոթ, 1942/43, 248 էջ:

հարուստ կենսափորձ եւ հիմնարար գիտելիքներ:

Մակար Բարխուդարեանցը ծնունդ է 1832 թ. Արցախի Խաչէն գաւառի Խանածախում (Խնածախ), որի ստուգաբանութեան վերաբերեալ պատմագրութեան մէջ կայ մի քանի տեսակէտ<sup>6</sup>: Բնակավայրը յիշատակուում է Շուշի գաւառում<sup>7</sup>: Այստեղ բնակիչները հաստատուել են 1686 թ. Սիւնեաց Խանածախ գիւղից<sup>8</sup>, սակայն XVII դարի ձեռագրերից մէկում Խանածախը յիշատակուում է «Քաշթաղու» երկրում<sup>9</sup>:

Գրիգոր եւ Նղիսապէթ Բարխուդարեանցների ընտանիքում<sup>10</sup> մեծանում էր ութ երեխայ՝ Կարապետը, Ստեփանը, Գէորգը (Մակար Եպիսկոպոսը), Յակոբը, Անթառամը, Շահազատը, Հերիքնազը, Վարվառան: Խանածախի Ս. Աստուածածին եկեղեցու յարակից գերեզմանատանը թաղուած են տոհմի ներկայացուցիչներից Մակարի պապը՝ Քեանդիսուտա-Խաչատուրը, տատը՝ Մարիամը, հայրը՝ Գրիգորը, մայրը՝ Նղիսապէթը, Սարգիս, Թէոս եւ Մկրտիչ հօրեղբայրները, վաղաժամ մահացած եղբայրը՝ Ստեփանը:

Գիւղում դպրոց չլինելու պատճառով պատանի Գէորգը արհեստ ու գրաճանաչութիւն է սովորել Արցախում, իսկ 1862-1868 թթ. Երուսաղէմի Ժառանգաւորաց<sup>11</sup> վարժարանում՝ աշակերտելով վանքի միաբան եւ հոգեւոր վարժարանի տեսուչ Մելիքսեդեկ Արք. Մուրատեանի մօտ: Յետագայում նա դարձել է Երուսաղէմի Ս. Յակոբ վանքի միաբան, ապա՝ վանքի հոգեւոր վարժարանի տեսուչ: 1869 թ. Յունիսի 22-ին ձեռնադրուել է սարկաւագ, իսկ 1870 թ.՝ վարդապետ: Վերադառնալով հայրենիք՝ 1875 թ. Մ. Բարխուդարեանցը ստանձնել է նախ էջմիածնի տպարանի տեսուչի, իսկ 1876 թ.՝ Զմիւռնիայի առաջնորդական փոխանորդի պաշտօնը՝ միաժամանակ վարելով քարոզչի, լուսարարի<sup>12</sup> եւ հիւանդանոցի տեսուչների պաշտօնները: 1880 թ. Գէորգ Դ Կաթողիկոսի (1866-1882 թթ.) կոնդակով դարձել է Մայր Աթոռի միաբան, իսկ 1892 թ. ստանձնել է Ալեքսանդրապոլի թեմի առաջնորդական փոխանորդի պաշտօնը:

1894 թ. Մ. Բարխուդարեանցը ձեռնադրուել է Եպիսկոպոս, դարձել է Ս. էջմիածնի Սինոդի անդամ<sup>13</sup>: 1894-1896 թթ. նշանակուելով Շամախու հայոց թեմի հոգեւոր առաջ-

<sup>6</sup> Համաձայն յիշատակութեան իբր խաներից մէկը բնակավայրը ծախել է, որից էլ առաջացել է ԽԱՆԱԾԱԽ անուանումը: Մէկ այլ տեսակէտի՝ թշնամին յարձակուել է տարածքի խանի վրայ, ով ասել է, թէ մի գաղ (բոյսի տեսակ է) էլ չի տայ, որից էլ առաջացել է ԽԱՆԱԾԱԽ անունը: Ոմանք էլ կապում են Խոնածախ այսինքն՝ խունկ ծախողների հետ: Տե՛ս Հայաստանի եւ յարակից շրջանների տեղանունների բառարան (այսուհետ՝ ՀՅԵՏԲ) հ. 2, Երեւան, 1988, էջ 743:

<sup>7</sup> Ա. Առաքելեան, Մակար Եպ. Բարխուդարեան, էջմիածին, 1974, Ը, էջ 66-74: Ի. Յարութիւնեան, Մակար Եպ. Բարխուդարեանց, Ազգագրական հանդէս, Թիֆլիս, 1906, գիրք 13, էջ 227:

<sup>8</sup> Մակար Եպ. Բարխուդարեանց, Արցախ, Երեւան, 2018, էջ 153:

<sup>9</sup> ՄՄ ձեռագիր 4281, Ներսէս Շնորհալի, Բանֆ չափաւ, 1647, Խանածախ, Քաշթաղու երկիր: Գրիչ՝ Մարիամ ապաշխարող, ստացող՝ գրչի հօրեղբայր՝ Մարկոս Եպիսկոպոս: Ձեռագիր 7840, Աւետարան, 1693 թ., գրիչ՝ Նիքիւս Քահանայ, Խանածախ:

<sup>10</sup> Մակար Եպ. Բարխուդարեանց, Արցախ, Երեւան, 2018, էջ 154:

<sup>11</sup> Ժառանգաւորաց վարժարանը Բաղդադում էր: Աշակերտները ստանում էին դպրութեան համապատասխան աստիճան: Վարժարանի նպատակն էր կրթել միաբաններ, ովքեր կը նուիրուէին հայոց հաւատին ու հոգեւոր կեանքին: Տե՛ս Մ. Օրմանեան, Հայկական Երուսաղէմ, Երուսաղէմ, 1931, էջ 190-193:

<sup>12</sup> Լուսարար եկեղեցական պաշտօնէյ է, ով հսկում է եկեղեցու ներքին բարեգործութիւնը, կարգ ու կանոնը, մաքրութիւնը, լուսատուութիւնը եւ այլն: Տե՛ս Հայերէն բացատրական բառարան (այսուհետ՝ ՀԲԲ), հ. 2, Երեւան, 1944, էջ 215:

<sup>13</sup> Սինոդը բացուել 1837 թ. Յովհաննէս Ը Կարբեցի (1831-1842 թթ.) կաթողիկոսի կողմից: Այն բաղկացած է Մայր Աթոռի միաբանութեան չորս եպիսկոպոսներից ու չորս վարդապետներից: Հիմնականում կատարում էր եկեղեցավարչական ու տնտեսական գործառնք, հոգեւորականների դատական գործերը եւ այլն: Գործել է մինչեւ 1917 թ.: Քրիստոնեայ Հայաստան հանրագիտարան (այսուհետ՝ ՀԳՀ), էջ 907-908:

նորդ՝ նա շրջագայել է պատմական Աղուանքում, Արցախ, Ուտիք, Փայտակարան նահանգներում՝ փնտրելով «թանկագին հարստութիւններ հայ պատմութեան համար»<sup>14</sup>։ Հաւաքած նիւթերի հիման վրայ նա շարադրել է պատմագիտական եւ աղբիւրագիտական արժէք ունեցող «Աղուանից երկիր եւ դրացիք»<sup>15</sup> եւ «Պատմութիւն Աղուանից»<sup>16</sup> ուսումնասիրութիւնները, որոնք առ այսօր օգտագործւում են նորագոյն շրջանի ուսումնասիրողների կողմից։ Մ. Բարխուդարեանցը փորձել է մանրամասն ուսումնասիրել երկրամասը, «բայց դարձեալ գիտութեամբ եւ անգիտութեամբ սխալներ շատ է արել, որոնց ուղղելը դարձեալ իրեն կը յանձնենք, որովհետեւ մենք ժամանակ չունէինք նրա գիրքը քննադատելու»<sup>17</sup>։ Թէեւ նման տեսակէտի գիրքն առ այսօր չի կորցրել իր արժէքը, իսկ Մ. Բարխուդարեանցի վերծանութիւնները ստացել են բացառիկ նշանակութիւն, քանի որ դրանց շնչին մասն է ուսումնասիրուել մինչեւ XX դարի 80-ական թթ. կէսերը։ Կարելոր համարելով աղբիւրագիտական նիւթերի հաւաքումը՝ նա նշում էր, որ ամէն գաւառից նիւթերը պէտք է հաւաքեն գրագէտ մարդիկ եւ դրանք թողնել անփոփոխ, չպէտք է առաջնորդուել սեփական սկզբունքներով<sup>18</sup>։ Այդ առումով նա սիրում էր իր գործը եւ «ամբողջ հոգուով նուիրուած էր դրան՝ չնայելով իւր թերի ուսմանը եւ կարելոր պատրաստութիւնից զուրկ լինելուն»<sup>19</sup>։

Մ. Բարխուդարեանցն ուսումնասիրել է նաեւ Արցախ նահանգն իր 24 գաւառների տեղագրութեամբ՝ օգտագործելով պատմական փաստերը, վիմագրերը, ձեռագիր յիշատակարանները, կաթողիկոսական կոնդակները, հրովարտականները։ Յատկապէս հարուստ է Արցախի վիմագրական ժառանգութիւնը. Մ. Բարխուդարեանցը գրառել է 405 վիմագիր, որից 165-ը պահպանուել է միայն իր յիշատակութեամբ։ Յաւելենք, որ նորագոյն շրջանի հրատարակութիւններում Արցախից գրառուած վիմագրերի թիւը հասնում է 1071-ի։ Ընդհանուր առմամբ Մ. Բարխուդարեանցի վիմագրական ժառանգութիւնում հաշուում է մօտ 550 վիմագիր, 32-ը՝ Տաւուշից (մեզ են հասել անաղարտ), 101-ը՝ Աղուանք աշխարհից (մի մասը ոչնչացուել էր մինչեւ XX դարի 80-ական թթ.), 405-ը՝ Արցախից (228-ը մեզ չեն հասել)։ Անշուշտ, Մ. Բարխուդարեանի վերծանութիւնները եւս զերծ չեն թերութիւններից, քանի որ XIX դարի 80-90-ական թթ. դեռ կիրառութիւն չունէին վիմագրերի գիտական վերծանութեան սկզբունքները, ուստի հեղինակը դրանք վերծանել է առանց տողանշատման՝ չիշատակելով տողերի քանակը։ Երբեմն ժամանակի սղութեան կամ վիմագրի դժուարընթեռնելիութեան պատճառով արձանագրութեան ամբողջական տողեր դուրս են մնացել տեքստից, կամ էլ դրանք խմբագրել է իր հայեցողութեամբ։ Կան արձանագրութիւններ, որոնք դուրս են մնացել նրա ուսումնասիրման շրջանակներից, որը պայմանաւորուած էր մի շարք հանգամանքներով. ե՛ւ խստաշունչ կլիման, ե՛ւ յուշարձանների կիսաւեր վիճակը, ե՛ւ ճանապարհների բացակայութիւնը դժուարացնում էին դրանց ուսումնասիրումը։

Մ. Բարխուդարեանցը զբաղուել է նաեւ գրականութեամբ։ Գրական մի քանի աշխատանքներում հանդէս է գալիս «ուստա Գէորգ Բարխուդարեան» անուամբ։ Մեզ է հա-

<sup>14</sup> Մ. Բարխուդարեանց, Աղուանից երկիր եւ դրացիք (վերահրատարակութիւն), Երեւան, 1999, էջ Ա։

<sup>15</sup> Մ. Բարխուդարեանց, Աղուանից երկիր եւ դրացիք, Թիֆլիս, 1893, 303 էջ։

<sup>16</sup> Մ. Բարխուդարեանց, Պատմութիւն Աղուանից, հատոր Ա, Վաղարշապատ, տպարան Մայր Աթոռ Ս. Էջմիածնի, 1902, 224 էջ։ Պատմութիւն Աղուանից, հատոր Բ, Թիֆլիս, 1907, 192 էջ։

<sup>17</sup> Մ. Սմբատեանց, Նկարագիր Սուրբ Ստեփաննոսի, Տիֆլիս, 1896, էջ ԺԱ-ԺԲ։

<sup>18</sup> Արարատ, 1887, թիւ 26, էջ 382-385

<sup>19</sup> Ի. Յարութիւնեան, նշ. աշխ., էջ 227։

սել նաեւ նրա հեղինակած կրօնական գործերը<sup>20</sup>, գեղարուեստական ստեղծագործութիւնները<sup>21</sup>, որոնցից մի քանիսը գրուած են Ղարաբաղի բարբառով: Ըստ նրա՝ գրականութեան մէջ կայ երկու ուղղութիւն, առաջինը մեծ կարեւորութիւն է տալիս անցեալին ու պատմական հնութիւններին, իսկ միւսն ապրում է նորով, սակայն փորձում է ուսումնասիրել անցեալում եղած երեւոյթները: Մեծ տեղ տալով հէքեաթներին՝ նա նշում էր, որ հէքեաթը պէտք է ներկայացնել այնպէս, ինչպէս գրի է առնուել: Հէքեաթը երեւակայութեան արդիւնք է, որը ժամանակի ընթացքում ենթարկուել է ներքին եւ արտաքին փոփոխութիւնների: Հէքեաթ հաւաքելը պահանջում է մեծ հմտութիւն եւ պատրաստակամութիւն<sup>22</sup>: Մ. Բարխուդարեանցը նշում է, որ բանահիւսութիւնը ստեղծում է ժողովուրդը հազարամեակների ընթացքում: Դրա զարգացմանը նպաստում են բարբառները, որոնք էլ աւելի են հարստացնում այն: Նմանօրինակ ժառանգութիւն կարելի է համարել Պըլը-Պուղու 189 զուարճախօսութիւնները, որոնք Ղարաբաղի բարբառով առաջինը գրառել է Մ. Բարխուդարեանցը<sup>23</sup>: Պըլը-Պուղին (իրական անունը Պօղոս, իսկ Պէլ նշանակում է գիծ, խենթուկ, ապուշ<sup>24</sup>, 1731-1810 թթ.), ծնունդով Վարանդայի Աւետարանոց գիւղից էր, թէեւ անգրագէտ էր, սակայն անսահման նուիրուած էր իր հովանաւորին՝ Մելիք Շահնազարին:

1886 թ. տպագրում է Մակար Եպիսկոպոսի պատմագեղարուեստական մէկ այլ ուսումնասիրութիւն «Գաղտնիք Ղարաբաղի» գիրքը, որտեղ ներկայացւում է Արցախի պատմութիւնը: Ժամանակին այն դարձել է «հետաքրքրական գրական վիճաբանութեան առարկայ»<sup>25</sup>, քանի որ գրքում տեղ գտած փաստերն ու իրադարձութիւնները քիչ չափազանցուած են<sup>26</sup>:

Մ. Բարխուդարեանցը զբաղուել է նաեւ մանկավարժական գործունէութեամբ: 1881-1882 թթ. նա աստուածաբանութիւն է դասաւանդել Շուշիի ռէալական եւ թեմական դպրոցներում: Շամախու թեմի առաջնորդ Մեսրոպ Արք. Սմբատեանցը, ջերմ կապեր ունենալով Մակար Բարխուդարեանցի հետ, նրան առաջարկել է թեմի Սաղիանի վանական դպրոցի տեսուչի եւ կրօնի ուսուցչի պաշտօնը<sup>27</sup>: Յետագայում, 1888 թ. Մակար Ա. կաթողիկոսի (1885-1891 թթ.) կոնդակով նա նշանակուել է թեմի Սաղիանի վանքի վանահայր եւ երկգասեայ վանական դպրոցի տեսուչ՝ «ազգային այս կարեւոր գործը

<sup>20</sup> Մ. Բարխուդարեանց, Քրիստոնէական վարդապետութիւն, Քննադատութիւն քննադատութեանց, Տիֆլիս, 1888: Նախապաշարմունք, Աստուածային հրահանգ հանրապարտուց, Թիֆլիս, 1902: Մատչելի փառագներ հայ ժողովրդականաց կարդալու համար, Բ. տետրակ, Վաղարշապատ, 1901:

<sup>21</sup> Մ. Բարխուդարեանց, Միրզա եւ Ամնա, Զմիւռնիա, 1876: Արագը տարին կտարի, Շուշի, 1883: Զոբանն ու նըշանաձը, Թիֆլիս, 1896: Զնաշխարհիկ տղայ, Շուշի, 1886: Բարոյական առածներ, Թիֆլիս, 1898:

<sup>22</sup> Արձագանք, 1884, թիւ 21, 321-323:

<sup>23</sup> ՀՍՀ, հատոր 9, էջ 288: Միջնադարում արեւելեան մի շարք երկրներում իշխաններն ունէին խեղկատակներ, ծաղրածուներ, որոնց «խօսքը լի էր խելով ու բարոյականութիւնով եւ հասարակութիւնը բերնէ բերան եւ որդւոց որդի» փոխանցում էր նրանց խօսքն ու գրոյցը: Յետագայում այդ սովորութիւնը տեղափոխուեց Արեւմուտք: Հայոց Արշակ Բ արքան ունէր Յոհան անունով խեղկատակ, ով զուարեացնում էր թագաւորին, եւ վերջինս «գիւղեր էր ընծայում անվայել ծաղրածուին»: Ընտանեկան հաւաքոյթների ժամանակ հրափրում էին խեղկատակի, որին Թիֆլիսում անուանում էին եւակայ, խօշտաբչի, մագալու, եարամագ, հանաֆչի, մասխարայ, լօթի եւ այլն: Արձագանք, 1883, թիւ 13, էջ 178-180: Մ. Բարխուդարեանց, Պըլը-Պուղի, Թիֆլիս, 1883: «Պըլը Պուղի», Մակար Բարխուդարեանց, Վաղարշապատ, 1904:

<sup>24</sup> ՀԲԲ, հատոր IV, Երեւան, 1945, էջ 92:

<sup>25</sup> Ի. Յարութիւնեան, նշ. աշխ., էջ 228:

<sup>26</sup> Լեօ, Վէպ, թէ պատմութիւն, Շուշի, 1887, էջ 116:

<sup>27</sup> ՀԱԱ, ֆոնտ 429, ցուցակ 1, գործ 78, Տեղեկութիւններ՝ Սաղիանի Ս. Ստեփաննոս եւ Մէլսարի Ս. Աստուածածին վանքերի մասին, թերթ 32: Մ. Սմբատեանց, Նկարագիր Սուրբ Ստեփաննոսի, էջ 103:

յառաջ տանելու»<sup>28</sup>։

Մակար Եպիսկոպոս Բարխուդարեանցն աշխատակցել է զանազան թերթերում եւ մահուանից յետոյ շատ անտիպ կարեւոր աշխատութիւններ է թողել<sup>29</sup>։ Ժամանակակիցները նրան բնութագրել են իբրեւ բարի, հեզահամբոյր, խոնարհ, ներողամիտ, առաքինի, «չերմ հաւատացող քրիստոնեայ, անշահասէր, անկաշառ»<sup>30</sup>։ Իր համեստ դրամական կարողութիւնը 3000 ռուբլու չափով կտակել է ազգային կազմակերպութիւններին։


Իր կեանքի վերջում Մ. Բարխուդարեանցը հրաժարուել է էջմիածնի Սինոդի անդամութիւնից՝ ցանկանալով ճգնել Ազգւլիսի Ս. Թովմա վանքում։ Սակայն 1906 թ. փետրուարի 6-ին նա մահացել է էջմիածնում, իսկ աճիւնն ամփոփուել է էջմիածնի Մայր Աթոռին կից միաբանական գերեզմանատանը։ Տապանաքարին համեստ արձանագրութիւն կայ, 4 տող<sup>31</sup>։

ՄԱԿԱՐ ԵՊԻՍԿՈՊ/ՊՈՍ ԲԱՐԽՈՒԴԱՐ/ԵԱՆ ԽՆԱԾԱԽՅԻ/ 1834-1906 ԹԹ.

Մակար Եպիսկոպոս Բարխուդարեանցը մինչեւ իր կեանքի վերջը հաւատարիմ մնաց իր ազգին եւ հայրենիքին, «որոնց շահերի, փառքի ու պատուի համար՝ ըստ չափու կարողութեան կէս դարուց աւելի, աշխատել է, տանջուել է, քարոզել է»<sup>32</sup>։

## ՍՈՒՍԱՆՆԱ ԱԴԱՄԵԱՆ

Պատմ. գիտ. թեկ., ՀՀ ԳԱԱ ՀԱՆ գիտաշխատող



<sup>28</sup> Մ. Սմբատեանց, Նկարագիր Սուրբ Ստեփաննոսի, էջ 19։

<sup>29</sup> Ա. Բէկ-Յովսէփեան, Մակար Եպս. Բարխուդարեան, Գեղունի, 1906, էջ 1-10, էջ 63։ Յաւոֆ, Մ. Բարխուդարեանցի արխիւային նիւթերի գտնուելու վայրի մասին տեղեկութիւններ չունենմ։

<sup>30</sup> Նոյն տեղում։

<sup>31</sup> Մակար Բարխուդարեանցի կենսագրութեանը նուիրուած յօդուածներում նրա ծննդեան թիւը յիշատակում է 1832 թ., սակայն տապանագրի վրայ նշուած է 1834 թ.։ Տե՛ս՝ Ա. Յարութիւնեան, Վաղարշապատ. վանքերը եւ վիմական արձանագրութիւնները, Ս. էջմիածին, 2016, էջ 234, արձ. 500։

<sup>32</sup> Ա. Բէկ-Յովսէփեան, նշ. աշխ., էջ 63։